

Uunga siunnersuut: Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata allanngortinnissaa pillugu Inatsisartut inatsisaat nr. xx, yy. 2015-imeersoq (§ 50-imi atuutilernissaanut piumasaqaatit allanngornerat)
(Aningaasaqarnermut Aatsitassanullu Naalakkersuisumit saqqummiunneqartoq)

pillugu

Aatsitassanut Ataatsimiititaliap

ISUMALIUTISSIISSUTAA

Siunnersuutip aappassaneerneqarnerani saqqummiunneqartoq

Aatsitassanut Ataatsimiititaliaq suliarinninnermini ukuninnga inuttaqarpoq:

Jens Erik Kierkegaard	Siumut	siulittaasoq
Juliane Henningsen	Inuit Ataqtigiit	siulittaasup tullia
Múte Bourup Egede	Inuit Ataqtigiit	siulittaasup tullia
Ineqi Kielsen	Siumut	
Sivert K. Heilmann	Atassut	
Naaja Nathanielsen	Inuit Ataqtigiit	
Agathe Fontain, sinniisoq	Inuit Ataqtigiit	
Kalistat Lund	Inuit Ataqtigiit	
Randi V. Evaldsen	Demokraatit	
Poul Hansen	Demokraatit	

Ulloq 15. oktober siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Inatsisissatut siunnersuutip, ilaatigut atuuttuulersitsinissamut aalajangersakkat allanngorneqarnissaannik imaqtartup ilaatigullu pigisat nalillit tigussaasut aatsitassarsiornermi aningaasaateqarfiup isertitassaanut tunngavissatut ilanngullugit naatsorsorneqannginnissaannik aalajangersaasup ilaatut inatsisissatut siunnersuut saqqummiunneqartoq 2014-imi upernaakkut ataatsimiinnermi saqqummiunneqaqqaarlunilu siullermeerneqaqqaarpoq. Inatsisissatut siunnersuummi matumani atuuttuulersitsinissamut aalajangersakkat allanngortinneqarneri kisimik pineqarput.

Atuuttuulersitsinissamulli aalajangersakkat allannguutissaat aappassaaneerneqanngillat, suliarinninnissaq 2014-imi ukiakkut ataatsimiinnermut kinguartinneqarmat. Inatsisissatut siunnersuut qinersinissamik nalunaaruteqartoqarnera pissutigalugu atorunnaarsinneqarpoq.

Inatsisip aaqqissugaanerani allannguutit saniatigut, § 50-imi atuuttuulersitsinissamut aalajangersakkat allanngortinneqarnissaat siunnersuutip imarai. Aatsitassarsiornermi Aningaasaateqarfik pilersinneqassappat Nunatta Karsiata naatsorsuutai ukiuni tulleriinni marlunni 10 mio. kr.-inik isertitaqarfiusut minnerpaamik akuerineqarsimanissaat siunnersuutikkut qulakkeerneqarpoq.

2. Siunnersuutip Inatsisartunit siullermeerneqarnera

Ataatsimiititaliamit aallarniutigalugu oqaatigineqarsinnaavoq siunnersuut Inatsisartunit tapersorsorluarneqarmat. Tamanna ataatsimiititaliamit tusaatissatut tiguneqarpoq, taamatullu ataatsimut isigalugu isumaqatigiittoqarnera tunngavigalugu isumaliutissiissummik naatsumik saqqummiussissalluni.

Ikinnerussuteqartut Inuit Ataqtigiit aatsitassarsiornermi aningaasaateqarfik pillugu inatsimmik iluarsinerup annikitsukkuutaanik pinnani ataatsimoortumik pisariaqarneranik tusarniaaffigisat arlallit oqarnerat isumaqatigaat. Taamaattumik Naalakkersuisut siunnersuutaat kinguartinneqassasoq, tamatumunngalu taarsiullugu allannguutissatut siunnersuutit Inatsisartunit akuersissutigineqartut ilanngullugit inatsimmik ataatsimoortumik saqqummiussisoqassasoq siunnersuutigaat. Tamatuma peqatigisaanik inatsisissatut siunnersuut inaarutaasup Aningaasaqarnermut Siunnersuisoqatigiinnit oqaaseqaateqarfigineqartariaqarneranik tusarniaaffigineqartut arlallit oqaatigisaat Inuit Ataqtigiinnit isumaqatigineqarpoq. Tamanna tunngavigalugu Inuit Ataqtigiit siunnersuut taanna itigartippaat aammalu allannguutit akuersissutigineqartut tamaasa ilanngullugit ataatsimoortumik saqqummiussisoqarnissaata utaqqimaarnissaa kissaatigalugu.

4. Ataatsimiititaliap siunnersuummik suliarinninnera

Siunnersuut siullermeerneqarmat inatsisissatut siunnersuut tapersorsorluarneqartoq ataatsimiititaliap paasivaa.

Ataatsimiititaliap aallarniutitut innersuussutigissavaa Aningaasaqarnermut Akileraartarnermullu Ataatsimiititaliap immikkoortunut UKA2015/120/121/122-nut isumaliutissiissutaa, tassani sammisaq pineqartoq pillugu siunnersuutit siusinnerusukkut saqqummiunneqartut sukumiisumik nassuiaatigineqarlutik.

Aammattaq immikkoortunut UKA2015/120/121/122-nut 8. oktober 2015-imi akuersissutigineqartunut Aningaasaqarnermut Akileraartarnermullu Ataatsimiititaliap isumaliutissiissutaa ataatsimiititaliamit innersuussutigineqarpoq, tassanilu ataatsimiititaliap kaammattuutigaa:

”- Naalakkersuisut ilaatigut Aningaasaqarnermut Siunnersuisoqatigiinnik oqaloqateqarnissaat, taamaaliornikkut aningaasaateqarfimmit tunniussisinaanissat aningaasaliinissamullu periarfissat eqaatsuunissaasa aammalu aningaasaqarnikkut ungasissumut isigaluni

attanneqarsinnaasumik iliuseqarnissap akornanni oqimaaqatigiissitsinissaq naleqquttoq anguniarlugu ajornanngippat oqaasertaliinissaq qulakkeerneqarsinnaaqqullugu. Nalilinnit nunatta ataaniittunit iluanaarutit ilaannik naleqquttumik annertussusilinnik kinguaariit aggersut aamma pissarsinissamut qulakkeerneqarnissaat aningaasaateqarfiup maleruagassatigut tunngavigisaani naammattumik annertussusilimmik aamma ilanngunneqartariaqarpoq. Naggasiullugu ataatsimiititaliamit naatsorsuutigineqarpoq Naalackersuisut UKA 2016-imi allannguutissaatut siunnersuummik saqqummiussilersaernerat kinguarsarneqassanngitsoq. Tamatumani minnerunngitsumik aatsitassarsiornermik suliniutit arlallit piariilernerat eqqarsaatigalugu, taamaalillunilu piffissap qaninnerup ingerlanerani aatsitassarsiornermit ingerlaavartumik isertitaqarnissaq ilimagineqarsinnaalluni.”

Immikkoortoq 121 ilusimisut iluseqartoq akuerineqassasoq Aningaasaqarnermut Akileraartarnermullu Ataatsimiititaliamit isumaqatigiittumit inassutigineqarpoq aammalu Inatsisartunit 8. oktober 2015-imi akuersissutigineqarluni. Taamaalilluni Aatsitassarsiornermi Aningaasaateqarfimmut allannguutissaatut siunnersuuteqaqqullugit Naalackersuisut peqquneqarnissaannik aalajangiiffigisassatut siunnersuummik Inatsisartut akuersissuteqarnerat inatsisissatut siunnersuutikkut matumuunakkut malinneqarpoq.

4.1 Inatsisissatut siunnersuutip taasissutissartaanut allannguutissatut siunnersuuteqarnissamut kaammattuut.

Inatsisissatut siunnersuutip aappassaaneerneqarnissaanut allannguutissatut siunnersuummik saqqummiusseqqullugit Naalackersuisut Aatsitassanut Ataatsimiititaliamit isumaqatigiittumit kaammattorneqarput, taamaalilluni inatsisissatut siunnersuutip taasissutissartaata kalaallisua danskisuuvalu imminnut naapertuuttunngorsinnaaqqullugit.

Inatsisissatut siunnersuutip kalaallisuuata taasissutissartaa kukkuneqartoq ataatsimiititaliap inatsisissatut siunnersuummik suliarinninnermini paasivaa. Naalackersuisut tamatumunnga allannguutissatut siunnersuummik nassiusseqqullugit ataatsimiititaliamit qinnuigineqarput, taamaalilluni taasissutissaq ima iluarsineqaqqullugu:

Uunga siunnersuut: Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata allanngortinneqarnera pillugu Inatsisartut inatsisaat nr. xx,yy. 2015-imeersoq.

5. Siunnersuutip aningaasaqarnikkut kingunerisassai

Siunnersuuteqartup aalajangiiffigisassatut siunnersuummini aningaasaqarnikkut kingunerisassat pillugit nassuiaatigisaasa saniatigut allatut naliliinissaminut ataatsimiititaliaq tunngavissaqarsorinngilaq.

6. Ataatsimiititaliap inassuteqaataa

Ataatsimiititaliami ikinnerussuteqartut Inuit Ataqtigiit siunnersuut pillugu ima oqaaseqarumapput:

Inuit Ataqtigiit siunnersuut naammagisimaarpat. Siunnersuummut Inatsisartut ataatsimiinneranni siusinnerusukkut Inuit Ataqtigiinnit saqqummiunneqartumut taanna naapertuuppoq. Aatsitassanulli Aningaasaaseqarfiup ataatsimoortumik allanngortinneqarnissaa pinnagu immikkoortukkuutaartumik allannguisarnissaq amerlanerussuteqartut orniginartinnerummassuk uggorigatsigu oqaatigissavarput. Aatsitassanullu Aningaasaateqarfimmi sinaakktissatut atugassarititaasut sukaterneqarnissaat Inatsisartunit akuerineqarmat naammagisimaarparput aammalu allannguutissatut siunnersuutit sinneruttut 2016-imi ukiakkut ataatsimiinnermi Naalakkersuisunit saqqummiunneqarnissaat qilanaaralutigu. Tamanna tunngavigalugu siunnersuut akuersaarlugu Inuit Ataqtigiinnit taasilersaarpugut.

Isumaliutissiisummi saqqummiunneqartunik oqaaseqaateqarluni **ataatsimiititaliap isumaqtigiittup** inatsisissatut siunnersuut **akuerineqassasq** inassutigaa.

Taama naatumik oqaaseqaateqarluni isumaliutissiisummilu allassimasut paasinnilluni ataatsimiititaliap siunnersuut aappasaaniigassanngortippaa.

Jens Erik Kierkegaard
Siulittaasoq

Múte Bourup Egede

Ineqi Kielsen

Naaja H. Nathanielsen

Kalistat Lund

Sivert K. Heilmann

Poul Hansen